



Broj/ Број : 02/2-50-1-23-27/09

Sarajevo/ Сарајево: 19.6.2009. godine

ZAPISNIK

27. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 11.6.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić, Rudo Vidović i Slobodan Šaraba, te Nenad Pandurević, sekretar Komisije. Opravnado je odsustvovao Branko Zrno.

Sjednici su, u svojstvu predlagaga i izvjestilaca, prisustvovali: Hamdo Tinjak, sekretar, Dušan Nešković i Dragiša Mekić, pomoćnici ministra, Mithat Salić, Nenad Klačar i Samir Sabljica, šefovi odsjeka u Ministarstvu vanjske trgovine i ekonomskih odnosa BiH, Zoran Perković, pomoćnik ministra vanjskih poslova BiH, Miroljub Krunic, pomoćnik ministra finansija i trezora BiH, Draženka Maličbegović, pomoćnik ministra civilnih poslova BiH, Emir Mehmedović, šef Odsjeka u Ministarstvu pravde BiH, Ermin Pešto, pomoćnik ministra, i Lejla Hadžić, viši stručni saradnik u Ministarstvu sigurnosti BiH, Dragiša Stanković, član Konkurencijskog vijeća, Darko Čobanov, zamjenik direktora Ureda za veterinarstvo BiH, Snežana Akulović, savjetnik direktora Uprave za zaštitu zdravlja bilja BiH, Sandra Kasalo-Fazlić, menadžer u Japan Tabacco, Momir Tošić, rukovodilac Makroekonomskog sektora u Vanjskotrgovinskoj komori BiH, Igor Petković, savjetnik zamjenika predsjedavajućeg Doma naroda Dušanke Majkić, Zoran Brkić, viši stručni saradnik u Sektoru za odnose s javnošću u PSBiH, i Jerko Ivanković Lijanović, poslanik u Predstavničkom domu Parlamentarne skupštine BiH kao predstavnik predlagaga Zakona o zaštiti domaće proizvodnje u okviru Sporazuma CEFTA.

Sjednica Komisije počela je u 12 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

DNEVNI RED

1. Usvajanje Zapisnika 26. sjednice Komisije;

2. Razmatranje Prijedloga zakona o zaštiti domaće proizvodnje u okviru Sporazuma CEFTA (druga komisijska faza), predlagač: Predstavnički dom PSBiH;
3. Razmatranje Prijedloga zakona o izmjenama i dopunama Zakona o konkurenciji (prva komisijska faza), predlagač: Vijeće ministara BiH;
4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Raiffeisen Zentralbank Österreich Aktiengesellschaft – Razvoj sistema vodosnabdijevanja u općini Livno;
5. Davanje saglasnosti za ratifikaciju Aneksa II. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u Bosni i Hercegovini;
6. Davanje saglasnosti za ratifikaciju Međunarodnih zdravstvenih propisa (2005.);
7. Davanje saglasnosti za ratifikaciju Sporazuma o ekonomskoj saradnji između Vijeća ministara BiH i Vlade Republike Srbije;
8. Davanje saglasnosti za ratifikaciju Amandmana na Konvenciju o osnivanju Vijeća za carinsku saradnju;
9. Davanje saglasnosti za ratifikaciju Evropske konvencije o obavještenjima o stranom pravu (London, 7. juni 1968.) s Dodatnim protokolom (Strazbur, 15. mart 1978.);
10. Davanje saglasnosti za ratifikaciju Dodatnog protokola uz Krivičnopravnu konvenciju protiv korupcije (ETS 191), Strazbur, 15. maj 2003.;
11. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala;
12. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova Republike Srbije o održavanju redovnih sastanaka predstavnika graničnih policija na državnom, regionalnom i lokalnom nivou;
13. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova Republike Srbije o provođenju zajedničkih patrola uz zajedničku državnu granicu;
14. Davanje saglasnosti za ratifikaciju Sporazuma između Vijeća ministara BiH i Vlade Crne Gore o provođenju graničnih provjera na zajedničkim graničnim prijelazima;
15. Razmatranje dopisa Ministarstva vanjskih poslova BiH „Mapa puta za liberalizaciju viznog režima za građane Bosne i Hercegovine – obaveze koje hitno treba ispuniti“, na osnovu zaduženja Kolegija Doma naroda (dopis broj: 02-50-1-24-27-4/09, od 13.5.2009.);
16. Razmatranje izvještaja i informacija Ministarstva vanjskih poslova BiH:
 - Rezolucija o evropskoj savjesti i totalitarizmu (zasjedanje Evropskog parlamenta 1.4. i 2.4.2009.);
 - Konferencija zemalja članica - potpisnica Jadranske povelje, od 1.7.2009. BiH preuzima šestomjesečno predsjedavanje;
17. Razmatranje izvještaja o međunarodnim aktivnostima komisija i parlamentarnih delegacija PSBiH:
 - Izvještaj o učešću delegacije PSBiH u PSOSCE-a u nadgledanju izbora u Makedoniji, 22.3.2009.
 - Izvještaj o učešću delegacije PSBiH u PSOSCE-a u nadgledanju izbora u Crnoj Gori, 29.3.2009.
 - Izvještaj sa zimskog zasjedanja parlamentarne skupštine OSCE-a, Beč, 19. i 20. 2. 2009.;
 - Izvještaj s drugog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 27.4. do 30.4. 2009.;
 - Izvještaj o posjeti delegacije Parlamentarne skupštine BiH Parlamentu Islamske Republike Iran, od 4. 5. do 7. 5. 2009.;

- Uloga parlamenata u podsticanju konkurentnosti i privrednog rasta kroz unapređenje poslovnog okruženja u zemljama zapadnog Balkana, Beograd, 6. i 7. 3. 2009. - Deklaracija o budućoj saradnji parlamenata u regionu;
- Izvještaj o učešću delegacije Parlamentarne skupštine BiH na proslavi 60. godišnjice NATO-a;

18. Tekuća pitanja.

Predloženi dnevni red usvojen je jednoglasno.

1. Usvajanje Zapisnika 26. sjednice Komisije

Zapisnik 26. sjednice Komisije usvojen je jednoglasno.

2. Razmatranje Prijedloga zakona o zaštiti domaće proizvodnje u okviru Sporazuma CEFTA (druga komisijska faza), predlagač: Predstavnički dom PSBiH

Predsjedavajuća Komisije Alma Čolo podsjetila je prisutne na dosadašnju proceduru ovog zakonskog prijedloga u PSBiH. Istakla je da je predlagač zakona Predstavnički dom PSBiH i da je Prijedlog zakona usvojen u Predstavničkom domu na 46. sjednici, održanoj 18.2.2009., te da je Domu naroda dostavljen 20.2.2009. radi razmatranja i usvajanja. Dalje je podsjetila na proceduru u Komisiji i Domu naroda.

Komisija je, na 25. sjednici, održanoj 15.4.2009., kao nadležna komisija i u prisustvu predstavnika predlagača, razmatrala Prijedlog zakona u prvoj komisijskoj fazi i većinom glasova podržala principe predloženog zakona. Dom naroda Parlamentarne skupštine BiH usvojio je Prijedlog zakona u prvom čitanju na 28. sjednici, održanoj 27.4.2009. Prilikom usvajanja Prijedloga zakona u prvom čitanju, Dom naroda usvojio je i sljedeći zaključak: „Zadužuje se Vijeće ministara BiH i nadležno ministarstvo da zbog poremećaja na tržištu i ogromnog deficita u međusobnoj razmjeni poljoprivrednih proizvoda preduzmu aktivnosti na pronalaženju odgovarajućih rješenja u pravcu zaštite poljoprivredne proizvodnje u Bosni i Hercegovini“.

Predsjedavajuća Komisije također je podsjetila da je amandmanska faza, u skladu s Poslovníkom Doma naroda, istekla 12.5.2009. i na Prijedlog zakona nisu uloženi amandmani. Komisija je, u prisustvu predlagača, razmatrala Prijedlog zakona u drugoj komisijskoj fazi, na 26. sjednici, održanoj 18.5.2009., i tom prilikom odlučila da se ne izjašnjava o Prijedlogu zakona, odnosno većinom glasova prihvatila je sljedeći zaključak: „Traži se od Kolegija Doma naroda Parlamentarne skupštine BiH da odobri produženje roka za ulaganje amandmana na Prijedlog zakona o zaštiti domaće proizvodnje u okviru Sporazuma CEFTA do 24 sata prije održavanja naredne sjednice Komisije, te produženje roka za dostavljanje izvještaja o Prijedlogu zakona do 48 sati prije održavanja naredne sjednice Doma naroda.“

Kolegij Doma naroda razmatrao je zaključak Komisije na 28. sjednici, održanoj 20.5.2009., i tom prilikom odlučio da „se produži amandmanska faza i rok za dostavu izvještaja za 15 dana od dana održavanja 29. sjednice Doma naroda“. Predsjedavajuća je konstatovala da na Prijedlog zakona i u toku produžene amandmanske faze nisu uloženi amandmani. Osim toga dodala je da Komisiji nisu dostavljene informacije o bilo kakvim značajnijim događajima ili aktivnostima u periodu nakon održavanja prethodne sjednice Komisije a koji bi mogli uticati na donošenje ovog zakona.

Hamdo Tinjak, sekretar Ministarstva vanjske trgovine i ekonomskih odnosa BiH, rekao je da ga je ministar zadužio da članove Komisije obavijesti da stav Ministarstva, koji je od ranije poznat, nije promijenjen, te da Ministarstvo vanjske trgovine i ekonomskih odnosa BiH ne podržava Prijedlog zakona o zaštiti domaće proizvodnje, odnosno ne podržava ovakav način rješavanja problema u vanjskotrgovinskoj razmjeni.

Poslanik Jerko Ivanković Lijanović, predstavnik predlagača Zakona o zaštiti domaće proizvodnje u okviru Sporazuma CEFTA, naglasio je da je u međuvremenu imao konsultacije s OHR-om i s Evropskom komisijom. Naglasio je da su članovi ekspertnog tima predstavnika Evropske komisije za BiH gosp. Kourkoulasa istakli da su svoje stavove o Prijedlogu zakona o zaštiti domaće proizvodnje na neki način zasnivali na stavovima Ministarstva vanjske trgovine i ekonomskih odnosa BiH, te da se njihov apel za eventualno neusvajane Zakona zasnivao na tome, a ne na suštini Zakona. Naglasio je također da su dvije stvari ostale nerazjašnjene, vezano za tarifne oznake i za proceduru pregovaranja. Kako ne bi bilo manipulacija prilikom provođenja ovog zakona, odlučili smo se za glave carinske tarife a ne za tarifne oznake, zbog toga što u carinskoj tarifi postoji veliki broj sličnih tarifnih oznaka. Planirano je da se, u skladu s članom 23.bis, prije stupanja na snagu ovog zakona pokrenu razgovori sa susjedima i usaglasi zajedničko rješenje.

Dušanka Majkić je istakla da ona smatra da bi se primijenio član 23.bis mora postojati dokaz da se radi o ugroženosti domaće proizvodnje. Osvrnula se i na proceduru, odnosno obrazloženje da će se nakon usvajanja zakona pokrenuti konsultacije, te pitala da li je ovo dobar način da dođe do razgovora sa susjedima. Smatra da je predlagač nedovoljno spreman ušao u ovu proceduru. Međutim, dodala je da se u slučaju ovog zakona može postaviti pitanje cilja i sredstva te istakla da je ovo pitanje postalo više politički nego ekonomski problem.

Rudo Vidović istakao je da je na prošloj sjednici odgađanjem izjašnjavanja o ovom zakonu ostavljen prostor za dodatne argumente o eventualnoj podršci ovom zakonu, te da se do danas ništa novo nije dogodilo. Smatra da niko u BiH nije protiv zaštite domaće proizvodnje ali da, na bazi detaljnije analize ovog zakona a i prema informacijama koje je i sam prikupio i pismima upozorenja nadležnog ministarstva i predstavnika međunarodnih organizacija i ambasada, ovaj zakon ne može podržati, a osnovni razlog za to je što će on dovesti u pitanje međudržavni Sporazum CEFTA.

Adem Ibrahimpašić istakao je da će podržati ovaj zakon, jer smatra da će on uticati na rješavanje problema koje naši izvoznici imaju, te da će naši partneri iz susjednih zemalja prihvatiti razgovore za njihovo rješavanje. Naveo je primjer zabrane izvoza goveđeg mesa koja traje već devet godina, zatim dugo čekanje naše robe na granici i potrebu za sklapanjem sporazuma sa susjednim zemljama o međusobnom priznavanju certifikata o kvalitetu. Istakao je i to da Parlamentarna skupština BiH ima obavezu prema biračima i da je dužan da učini ono što je u njegovoj nadležnosti, te smatra da donošenje ovog zakona predstavlja zaštitu domaćih proizvođača i izvoznika i da će sigurno uticati na rješenje mnogobrojnih problema sa susjednim zemljama.

Slobodan Šaraba rekao je da će podržati Prijedlog ovog zakona a osnovni razlog za to su domaći proizvođači i prerađivači koji su u katastrofalnom položaju u odnosu na proizvođače i prerađivače u našem okruženju.

Govoreći o početku pregovora, Jerko Ivanković Lijanović pojasnio je da su postojale dvije mogućnosti. Prva je bila da Vijeće ministara BiH donese odluku i pokrene pregovore. A pošto to nije urađeno, Parlamentarna skupština BiH ne može pokrenuti pregovore prije glasanja jer bi to značilo prejudiciranje odluke. Tek nakon glasanja imamo mogućnost pregovora.

Zaključujući raspravu, predsjedavajuća Komisije naglasila je da je ovaj zakon u proceduri već četiri mjeseca i da je bilo ostavljeno dovoljno prostora da se ispoštuje odredba člana 23.bis, da se obave konsultacije prije nego što država uvede unilateralne mjere, te je, s obzirom da nije ništa urađeno, predložila da se članovi Komisije, u skladu s članom 104. Poslovnika Doma naroda, izjasne o Prijedlogu zakona u drugoj komisijskoj fazi.

Nakon toga pristupilo se glasanju, te je Komisija, s četiri glasa "za" i jednim glasom "protiv", prihvatila Prijedlog zakona o zaštiti domaće proizvodnje u okviru Sporazuma CEFTA u drugoj komisijskoj fazi.

U skladu s odredbama člana 107. Poslovnika Doma naroda Parlamentarne skupštine BiH, za izvjestioca na sjednici Doma Komisija je odredila Almu Čolo, predsjedavajuću Komisije.

3. Razmatranje Prijedloga zakona o izmjenama i dopunama Zakona o konkurenciji (prva komisijska faza), predlaže: Vijeće ministara BiH

Predsjedavajuća je podsjetila da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona. Dalje je upoznala prisutne s dosadašnjom procedurom u vezi s ovim prijedlogom zakona.

Vijeće ministara BiH je, kao ovlašteni predlaže, 29.4.2009., Parlamentarnoj skupštini BiH dostavilo Prijedlog zakona o izmjenama i dopunama Zakona o konkurenciji sa zahtjevom za razmatranje po osnovnom zakonodavnom postupku. Ustavnopravna komisija Doma naroda Parlamentarne skupštine BiH je, na 38. sjednici, održanoj 4.6.2009., razmatrala Prijedlog zakona i dostavila mišljenje da postoji valjan ustavnopravni osnov za usvajanje navedenog zakona kao i usaglašenost sa Ustavom i pravnim sistemom BiH. Predstavnički dom PSBiH usvojio je Prijedlog zakona u prvom čitanju na 54. sjednici, održanoj 27.5.2009.

Predsjedavajuća je informirala prisutne da je, shodno odredbama člana 98. stav (2), zatraženo i dobiveno mišljenje Direkcije za evropske integracije BiH u kojem je, između ostalog, navedeno da je „Prijedlog zakona o izmjenama i dopunama Zakona o konkurenciji djelimično usklađen“ s relevantnim aktima Evropske zajednice te da „donošenje izmjena i dopuna Zakona o konkurenciji predstavlja realizaciju kratkoročnog prioriteta iz Evropskog partnerstva koji se odnosi na poboljšanje postojećeg antitrustovskog zakonodavstva u skladu sa zahtjevima Sporazuma o stabilizaciji i pridruživanju“.

Kratko uvodno obrazloženje o prijedlogu ovog zakona dao je Samir Sabljica, šef Odsjeka u Ministarstvu vanjske trgovine i ekonomskih odnosa BiH. Rekao je da je ovaj zakon ostvarenje akcionog plana za realizaciju prioriteta iz dokumenta o Evropskom partnerstvu s Bosnom i Hercegovinom. Naglasio je da je 29. aprila 2009. u Briselu održan sastanak Pododbora za unutrašnje tržište i konkurenciju BiH i Evropske komisije, te da su tada prezentirane ove izmjene i dopune Zakona o konkurenciji, što je pozdravljeno i ocijenjeno kao napredak u procesu evropskih integracija i usklađivanju s komunitarnim pravom Evropske unije.

Duška Majkić rekla je da je jasno da konkurencija spada u prioritete Evropskog partnerstva i da je ovaj zakon već trebalo da bude usvojen. Konstatirala je da je Prijedlog zakona rezultat analize i usaglašavanja s direktivama Evropske unije, te da nema potrebe voditi raspravu i da treba usvojiti ovaj zakon.

Dragiša Stanković, član Konkurencijskog vijeća BiH, istakao je da je ovaj zakon u potpunosti usklađen s evropskom regulativom te da ga čudi mišljenje Direkcije za evropske integracije BiH u kojem se kaže da je djelimično usklađen.

Nakon kraće rasprave o usklađenosti ovog zakona sa zakonodavstvom Evropske unije i mišljenju DEIBiH u kojoj su učestvovali: Duška Majkić, Samir Sabljica i Dragiša Stanković, predsjedavajuća Komisije konstatirala je da nije potrebno dalje raspravljati o tome, te predložila da se članovi Komisije glasaju o principima predloženog zakona.

Komisija je jednoglasno je podržala principe Prijedloga zakona o izmjenama i dopunama Zakona o konkurenciji.

Komisija je, također jednoglasno, odlučila predložiti Domu naroda da, prilikom usvajanja Prijedloga zakona u prvom čitanju, donese i sljedeći zaključak: "S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o izmjenama i dopunama Zakona o konkurenciji, produžava se amandmanska faza za ovaj prijedlog zakona do 48 sati prije održavanja sjednice Komisije na kojoj će biti razmatran".

4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Raiffeisen Zentralbank Österreich Aktiengesellschaft – Razvoj sistema vodosnabdijevanja u općini Livno

5. Davanje saglasnosti za ratifikaciju Aneksa II. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u Bosni i Hercegovini

Predsjedavajuća Komisije predložila je da se oba međunarodna sporazuma razmatraju zajedno s obzirom da su oba u nadležnosti Ministarstva finansija i trezora BiH i da se odnose na istu problematiku. Prijedlog je jednoglasno prihvaćen.

Nakon uvodnog obrazloženja Miroljuba Krunića, pomoćnika ministra finansija i trezora BiH, članovi Komisije jednoglasno su odlučili predložiti Domu naroda davanje saglasnosti za ratifikaciju:

- Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Raiffeisen Zentralbank Österreich Aktiengesellschaft – Razvoj sistema vodosnabdijevanja u općini Livno, i
- Aneksa II. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u Bosni i Hercegovini.

6. Davanje saglasnosti za ratifikaciju Međunarodnih zdravstvenih propisa (2005.)

Uvodno obrazloženje o Međunarodnim zdravstvenim propisima dala je Draženka Malićbegović, pomoćnik ministra civilnih poslova BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Međunarodnih zdravstvenih propisa (2005.).

7. Davanje saglasnosti za ratifikaciju Sporazuma o ekonomskoj saradnji između Vijeća ministara BiH i Vlade Republike Srbije

8. Davanje saglasnosti za ratifikaciju Amandmana na Konvenciju o osnivanju Vijeća za carinsku saradnju

Predsjedavajuća Komisije predložila je da se oba međunarodna sporazuma razmatraju zajedno s obzirom da su oba u nadležnosti Ministarstva vanjske trgovine i ekonomskih odnosa BiH.

Uvodno obrazloženje Sporazuma o ekonomskoj saradnji između Vijeća ministara BiH i Vlade Republike Srbije dao je Mithat Salić, šef odsjeka u Ministarstvu vanjske trgovine i ekonomskih odnosa BiH, a obrazloženje Amandmana na Konvenciju o osnivanju Vijeća za carinsku saradnju dao je Nenad Klačar, također šef odsjeka u Ministarstvu vanjske trgovine i ekonomskih odnosa BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Sporazuma o ekonomskoj saradnji između Vijeća ministara BiH i Vlade Republike Srbije, i*
- *Amandmana na Konvenciju o osnivanju Vijeća za carinsku saradnju.*

9. Davanje saglasnosti za ratifikaciju Evropske konvencije o obavještenjima o stranom pravu (London, 7. juni 1968.) s Dodatnim protokolom (Strazbur, 15. mart 1978.)

10. Davanje saglasnosti za ratifikaciju Dodatnog protokola uz Krivičnopravnu konvenciju protiv korupcije (ETS 191), Strazbur, 15. maj 2003.

S obzirom da su sporazumi pod tačkom 9. i 10. dnevnog reda u nadležnosti Ministarstva pravde BiH, prihvaćen je prijedlog predsjedavajuće Komisije da se razmatraju zajedno.

Uvodno obrazloženje dao je Emir Mehmedović, šef odsjeka u Ministarstvu pravde BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Evropske konvencije o obavještenjima o stranom pravu (London, 7. juni 1968.) s Dodatnim protokolom (Strazbur, 15. mart 1978.), i*
- *Dodatnog protokola uz Krivičnopravnu konvenciju protiv korupcije (ETS 191), Strazbur, 15. maj 2003.*

- 11. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala**
- 12. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova Republike Srbije o održavanju redovnih sastanaka predstavnika graničnih policija na državnom, regionalnom i lokalnom nivou**
- 13. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova Republike Srbije o provođenju zajedničkih patrola uz zajedničku državnu granicu**
- 14. Davanje saglasnosti za ratifikaciju Sporazuma između Vijeća ministara BiH i Vlade Crne Gore o provođenju graničnih provjera na zajedničkim graničnim prijelazima**

Predsjedavajuća Komisije predložila je da se sporazumi od 11. do 14. tačke dnevnog reda razmatraju zajedno s obzirom da su u nadležnosti Ministarstva sigurnosti BiH i da se svi odnose na srodna pitanja. Prijedlog je jednoglasno prihvaćen. Uvodno obrazloženje Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala dala je Lejla Hadžić, viši stručni saradnik u Ministarstvu sigurnosti BiH, dok je obrazloženje za tačku 12. do 14. dao Ermin Pešto, pomoćnik ministra sigurnosti BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala,*
- Protokola između Ministarstva sigurnosti BiH i Ministarstva unutrašnjih poslova Republike Srbije o održavanju redovnih sastanaka predstavnika graničnih policija na državnom, regionalnom i lokalnom nivou,*
- Protokola između Ministarstva sigurnosti BiH i Ministarstva unutrašnjih poslova Republike Srbije o provođenju zajedničkih patrola uz zajedničku državnu granicu, i*
- Sporazuma između Vijeća ministara BiH i Vlade Crne Gore o provođenju graničnih provjera na zajedničkim graničnim prijelazima.*

- 15. Razmatranje dopisa Ministarstva vanjskih poslova BiH „Mapa puta za liberalizaciju viznog režima za građane Bosne i Hercegovine – obaveze koje hitno treba ispuniti“, na osnovu zaduženja Kolegija Doma naroda (dopis broj: 02-50-1-24-27-4/09, od 13.5.2009.)**

Predsjedavajuća Komisije naglasila je da je Kolegij Doma naroda na 27. sjednici, održanoj 13.5.2009., zadužio ovu komisiju da razmatra i da se izjasni o ovom dokumentu. Dalje je informirala prisutne da je Ministarstvo vanjskih poslova BiH, 7.5.2009., dostavilo dopis pod nazivom „Mapa puta za liberalizaciju viznog režima za građane Bosne i Hercegovine – obaveze koje hitno treba ispuniti“. Pismo je upućeno članovima Predsjedništva BiH, članovima kolegija i predsjedavajućim klubova oba doma Parlamentarne skupštine BiH i predsjedavajućem i svim članovima Vijeća ministara BiH. U prilogu dopisa dostavljeno je pismo ambasadora Dimitrisa Kurkulasa, šefa Delegacije Evropske komisije u BiH, „Provođenje Mape puta za liberalizaciju viznog režima – neriješena pitanja“, upućeno predsjedavajućim i članovima kolegija oba doma Parlamentarne skupštine BiH.

Predsjedavajuća je istakla da se u dopisu Ministarstva vanjskih poslova BiH navodi da postoje saznanja iz diplomatskih krugova da se, ako budu usvojeni zakoni navedeni u dopisu šefa Delegacije Evropske komisije u BiH, s velikom sigurnošću može očekivati da će Evropska komisija dati pozitivno mišljenje i predložiti Vijeću EU ukidanje viznog režima za BiH. U tom smislu u dopisu se pozivaju svi kojima je upućeno da preduzmu hitne korake za održavanje neophodnih konsultacija i preduzimanje konkretnih mjera.

Nakon uvodnog obrazloženja Zorana Perkovića, pomoćnik ministra vanjskih poslova BiH, i kraće rasprave u kojoj su učestvovali: Dušanka Majkić, Adem Ibrahimpašić i Alma Čolo, Komisija je predmetni dopis jednoglasno primila k znanju te konstatirala sljedeće:

- *da su u međuvremenu od dostavljanja predmetnog dopisa već preduzete određene aktivnosti, a prije svega da je Vijeće ministara BiH na 89. sjednici, održanoj 4.6.2009. , utvrdilo četiri prijedloga zakona iz Mape puta za liberalizaciju viznog režima (Prijedlog zakona o kontroli kretanja oružja i vojne opreme, Prijedlog zakona o međunarodnoj pravnoj pomoći u krivičnim stvarima, prijedlog zakona o graničnoj kontroli, Prijedlog zakona o sprečavanju pranja novca i finansiranja terorističkih aktivnosti) koji su po hitnoj proceduri usvojeni na 55. sjednici Predstavničkog doma, 10.6.2009., koje će, također po hitnom postupku, razmatrati i Dom naroda na 30. sjednici, 15.6.2009.*
- *prema utvrđenom dnevnom redu 31. sjednice Doma naroda, koja će biti održana 18.6.2009., kao jedna od tačaka dnevnog reda bit će razmatran i Plan aktivnosti za ispunjavanje obaveza iz preporuka Evropske komisije u vezi s Mapom puta za liberalizaciju viznog režima za građane BiH, što će biti prilika za raspravu o svim aktuelnim i relevantnim pitanjima značajnim za ispunjavanje obaveza s ciljem liberalizacije viznog režima za građane BiH.*

16. Razmatranje izvještaja i informacija Ministarstva vanjskih poslova BiH:

- **Rezolucija o evropskoj savjesti i totalitarizmu (zasjedanje Evropskog parlamenta 1. i 2.4.2009.);**
- **Konferencija zemalja članica - potpisnica Jadranske povelje, od 1.7.2009. BiH preuzima šestomjesečno predsjedavanje;**

Članovi Komisije primili su k znanju navedene informacije i izvještaje Ministarstva vanjskih poslova BiH.

17. Razmatranje izvještaja o međunarodnim aktivnostima komisija i parlamentarnih delegacija PSBiH:

- **Izvještaj o učešću delegacije PSBiH u PSOSCE-a u nadgledanju izbora u Makedoniji, 22.3.2009.**
- **Izvještaj o učešću delegacije PSBiH u PSOSCE-a u nadgledanju izbora u Crnoj Gori, 29.3.2009.**
- **Izvještaj sa zimskog zasjedanja parlamentarne skupštine OSCE-a, Beč, 19. i 20.2. 2009.;**
- **Izvještaj s drugog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 27.4. do 30. 4. 2009.;**
- **Izvještaj o posjeti delegacije Parlamentarne skupštine BiH Parlamentu Islamske Republike Iran, 4.5. do 7. 5. 2009.;**
- **Uloga parlamenata u podsticanju konkurentnosti i privrednog rasta kroz unapređenje poslovnog okruženja u zemljama zapadnog Balkana, Beograd, 6. i 7. 3. 2009., Deklaracija o budućoj saradnji parlamenata u regionu;**

- **Izveštaj o učešću delegacije Parlamentarne skupštine BiH na proslavi 60. godišnjice NATO-a.**

Članovi Komisije primili su k znanju navedene izvještaje i zabilješke o međunarodnim aktivnostima parlamentarnih komisija i delegacija.

18. Tekuća pitanja

U okviru ove tačke nije bilo rasprave.

Sjednica Komisije završena je u 13,30 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo